

# NA KEKEDELAA FAASIA A JAMES

## Si baea totongenao.

<sup>1</sup> I nau a James na wane ni rao a God ma a Jesus Christ na Lord. Si baelaa diana fuagamu na tooa a God gi sui, na gamu too tagala i laona na molaagali sui.

<sup>2</sup> Nau ku alangi gamu ana na haasigu gi sulia a God naa na Maa gia sui. Si kada gamu daotoona na iilitooa e'ete kwailiu oro gi, muka manata agamu hasa si doo nae e diana fuagamu. <sup>3</sup> I gamu mu haitamana, lea so muka manata mamana lea dongaa, boroi ana muka daotoona na iilitooa urinae gi, na manata mamanalaa gamu ka rigita asianaa sulia na doo nae gi. <sup>4</sup> Nia naa, musi mamalo uria manata mamanalaa, ma tara a God ka falea si malutaa o'olo na nia e dooria fuagamu, ma langi musi kukuru ana tesi doo na e lea faasia a God.

<sup>5</sup> Haia, lea so ta wane ani gamu ka langi si too ana liotoolaa, nia ka gania a God, ma tara a God ka falea fuana. Sulia a God e eele asianaa uria na falelanalaa mai si doo oro gi, ma i nia kasi ngatafia ta wane na e gania. <sup>6</sup> Sui, boroi ana ka urinae, lea ta wane ka gania a God, nia ka manata mamana ngado naa tara a God ka falea fuana. Ma lea ta wane kasi manata mamana ngado urinae, nia e iilingia na nafo i aasi baa na ooru e oorufia ma ka nanafolaa. <sup>7-8</sup> Na wane urinae, nia e too ana roo si lio, sulia

na manatalana langi kasi too ngado ana tee si doo. Sulia nia urinae, nia kasi manata hasa tara a Lord ka falea tesi doo fuana.

<sup>9-10</sup> Haasigu gi ae, boroï ana teni wane ani gamu daka siofaa ma teni wane ani gamu daka rikidoo, i gamu sui go muka eele, sulia a God e faabaitaa na tooa siofaa gi, ma ka faato'oua na tooa rikidoo gi. Boroï ana ta wane ka todadoo baita, na doo oro nia gi tara ka funu iilingia na tage ai diana gi na da taga, sui ma daka too go sulia si kada kukuru. <sup>11</sup> Si kada na hato e tae mai ma ka agofia na tage ai nae gi, daka kuku, ma daka mae na ada ma daka asi gera i hae gano, ma na aada dianalada baa ka langi na ana laugo ada. Urinae laugo, tara nia ka mae si kada nia ka iilia ua go ana si raoa ni tooda malefoa nia.

<sup>12</sup> Oilakea fuana na wane na e daotoona na iilitooa oro ma na manata mamanaa nia ka ngado go ana. Sulia, si kada na wane e manata mamana ngado i laona na iilitooa gi, tara a God ka falea na mouria faalu fuana. Na mouria faalu nae, a God e bae aalualu sui na ana fuada na tooa gi na da rakediana ana. <sup>13</sup> E langi si diana fuana ta wane ka manata hasa a God naa na e falea na iilitooa naa fuana uria na iililana si doo na e ta'a. Langi si diana nia ka manata urinae, sulia a God e afetai ka iilitoona ta wane uria na iililana ta si doo na e ta'a, ma ka afetai laugo so ta wane ka iilitoona a God ana si doo na e ta'a. <sup>14</sup> Na wane e iilia si doo ta'a sulia nia e roosulia na kwaidooria ta'a nia i talana. <sup>15</sup> Ma si kwaidooria ta'alaa nae tara ka baita ma tara nia ka hau ana doo ta'a gi asianaa, ma si kada si doo ta'a nae gi e baita, tara ka falea na maea.

<sup>16</sup> Nia naa, haasi gi diana nau ae, langi musi manata garo sulia si doo nae gi. <sup>17</sup> Sulia na doo gi sui na e diana, e ita mai faasia a God i langi. Ma e afetai haso a God ka talana tolofana. Sulia nia langi kasi iilingia na doo gi lofo halo na e haungaida ma daka tala mai, ma daka oolisi, ma daka aalua rodoa.

<sup>18</sup> A God e fili gia ana si baea mamana nia, eeri gia ka baita naa, liufia na doo gi sui na nia e haungainida.

<sup>19</sup> Haasi diana nau gi ae, muka manata diana sulia na baelagu naa: muka noni maabe uria na fafurongolana. Ma langi musi ali'ali uria na baelaa, ma langi musi rakehasu ali'ali. <sup>20</sup> Lea ta wane e rakehasu, afetai ka iilia si doo o'olo gi na a God e dooria. <sup>21</sup> Nia naa, muka lugasia na aadelaa ta'a ma na aabulolaa ta'a gamu gi sui. Muka faato'ou gamu i talagamu ma muka noni maabe uria na aadelaa sulia na baelana a God na e aalua naa laona na ruruu gamu, ma ka bobola naa fai nia ka faamouri gamu.

<sup>22</sup> Langi musi suge ani gamu i talagamu, aata muka manata haso na rongolana go ana si baelana God e diana. E langi nae! Langi musi fafurongoa go agamu baelana a God gi, ma muka iilia si doo gi na e haea. <sup>23</sup> Na wane na e rongoa go ana si baea naa gi, ma ka langi si iilia go si doo gi na nia e rongoa, i nia e iilingia ta wane na e bubungia na nununa maana i laona doo ni iironunulaa. <sup>24</sup> Haia, na wane nae, i buira nia ka riki nia diana i talana nia, nia e lea na ana, ma ka manata buro ali'ali na ana ana na maana e

aada utaa baa. <sup>25</sup> Sui taa, na wane na e aadaada diana i laona na kwaieresia nia a God gi, ma ka iilia si doo gi na kwaieresia gi da haea, ma kasi rongoa go ana ma ka manata buro, tara a God ka faadianaa si doo gi sui na nia e iilia. Sulia na kwaieresia a God gi da diana teefou ma daka faanonilaa ana tooa gi.

<sup>26</sup> Boro ana ta wane ka manata haso nia e lea naa sulia na tolofana a God, sui nia langi kasi aade diana sulia doo gi na nia e haea, nia e fooasia o'oni go ana, ma ka suge nia go ana i talana. <sup>27</sup> A God na Maa gia e haitamana na wane na e fooasia mamana ana, nia ka iilia si doo diana gi fuada na tooa gi iilingia adomilada na aai oru gi ma na wela iinomae gi na da too ana afetailaa. Na wane urinae, nia langi kasi faalamainia na doo ta'a gi lao molaagali uria nagalanalaa na tolofaa diana nia gi.

*Si taa naa na tooa ka iilia fuada na tooa gi sui.*

## 2

<sup>1</sup> Oote haasigu gi ae, sulia i gamu mu manata mamana ana a Jesus Christ na Lord diana gia, langi musi ketoa na tooa gi ana rikilana go ana i bali maa. <sup>2-3</sup> Lea so ta roo wane daaro dao mai ana na figulaa gamu, ta wane na wane todadoo ma ta wane aai ka siofaa. Na wane todadoo nae e oofi ana maku diana gi asianaa ma ka aalua na kome diana ana gold i kakauna abana. Ma si kada molu rikia ana, molu ka manata baita ana, ma muka bae urii, <<I oe o lea mai oko gwouru diana amu i seenaa.>> Sui, na wane aai baa e siofaa, e oofi kakari go mai ana. Ma muka bae

urii, <<Take amu, ma langi oko gwouru boroi amu ana i hae gano i ninimana aegu naa.>>

<sup>4</sup> Haia, si aadelaa urinae na mu garo ana, sulia mu tookita na tooa gi urinae ma mu ketoda sulia na manatalaa ta'a gamu gi.

<sup>5</sup> Nia naa, oote haasi diana nau gi ae, muka rongo. A God e filia na tooa gi na da siofaa i bali ana molaagali hai so daka too ana manata mamanalaa baita. Ma nia ka filia tooa urinae gi hai daka too ana na Initooa na i nia e bae aalualu sui na ana uria falelana fuada na tooa gi na da rakediana ani nia. <sup>6</sup> Sui, i gamu naa mu uuri asianaa faafia na tooa siofaa gi. Utaa? Ni tei na e iilia na ta'alaa fuagamu ma ka ngali gamu uria na ketolaa? Na tooa todadoo naa gi naa! <sup>7</sup> Ma utaa? Gamu manata haso ni tei na e nagaa na hata diana nia a Christ na wane na e nauhata ani gamu? Na tooa todadoo naa gi naa!

<sup>8</sup> Haia, ma e diana fuana muka roosulia na kwaieresia baita ka tasa na e faasia a Lord. Nia e haea i laona na Kekedelaa Aabu gi urii, <<Muka rakediana fuana tooa gi sui ka iilingia laugo na mu rakediana fuagamu i talagamu.>> <sup>9</sup> Sui lea so gamu ka ketoa na tooa gi ana rikilana go ana i bali maa tama i gamu mu garo nae. Na kwaieresia gi naa na e faatainia gamu aadea doo ta'a. <sup>10</sup> Boroi ana ta wane ka iilia na doo gi sui na kwaieresia gi naa e haea, sui taa, lea so tee si doo go ana kwaieresia nae gi na wane nae kasi iilia, nia e oia na ana na kwaieresia nae gi sui. <sup>11</sup> Sulia a God na e bae urii, <<Ka langi musi ooe,>> ka bae laugo urii, <<Langi musi hauwane aai.>> Lea so ta wane kasi ooe boroi, ma ka hauwane, i

nia ka oia na ana na kwaieresia gi naa. <sup>12</sup> Na kwaieresia gi naa e faanonilaa na tooa gi, ma na kwaieresia nae gi laugo na a God tara ka keto gamu ana. Nia naa, muka aadaada diana uria si taa gi na gamu haeda ma si taa gi na gamu ilia. <sup>13</sup> Sulia si kada a God e ketoa ana tooa gi, nia langi kasi kwaimanatai fuana ta wane na e langi si kwaimanatai fuana wane ete gi. Ma na wane aai na e kwaimanatai ma ka aade diana fuana tooa gi, tara a God ka manatai nia ma ka aade diana fuana si kada nia ka ketoa na tooa gi.

*Na faatailana na manata mamanalaa ana a God.*

<sup>14</sup> Haasigu gi ae, e langi si diana fuana ta wane ka haea nia e manata mamana ana a God, lea nia langi kasi ilia go tesi doo diana gi uria na faatailana na manata mamanalaa nia. Sulia na manata mamanalaa urinae e afetai ka faamouria nia. <sup>15</sup> Lea ta haasi amu ma langi waiwane e langi too ana tesi maku ma langi tesi fanga, <sup>16</sup> ma muka bae urii go agamu fuana, <<E langi osi manata a'abo lau, o lea ma oko oofi diana ma oko fanga aabusu amu,>> sui langi musi falea go tesi doo uria na adomilana. Utaa? Gamu manata hasa na baelaa o'oni urinae ka adomi nia nae? E langi. <sup>17</sup> Nia naa, lea ta wane e haea i nia e manata mamana ana a God, sui ma ka langi si ilia go tesi doo diana, na manata mamanalaa urinae e langi si mamana ma ka mae.

<sup>18</sup> Ta wane e haea oto urii, <<Teni tooa gi gera ka manata mamana ana a God, ma teni tooa aai gi daka ilia doo diana gi.>> Haia, i nau ku haea, lea ta wane ka langi ilia na doo diana gi, nia

faatainia na manata mamananaa nia ana a God ka langi si mamana. Sulia na wane na e manata mamana, tara ka faatainia laugo na manata mamananaa nia ana aadela diana gi. <sup>19</sup> Nau ku haitamana i gamu mu manata mamana hasa tee God go na e too, ma si doo nae e diana naa nae. Haia, ma na aagalo ta'a gi boroi da manata mamana laugo ana si doo nae, ma si doo nae na e aadea gera ka mou ma daka lelebe. <sup>20</sup> Langi musi nue! Nau ku faatainia fuagamu, lea ta wane haea i nia e manata mamana ana a God, sui ka langi si iilia go tesa doo diana, na manata mamananaa urinae e o'oni go ana. <sup>21</sup> Gamu haitamana naa i gia futa ana na kwalafaa a Abraham. Uria taa na a God ka haea a Abraham naa na wane o'olo? Si doo diana na nia e iilia na e aadea nia ka urinae. Sulia i nia e aalua na alakwa nia i fafona fuliere uria na kwaisuusilaa nia fuana a God. <sup>22</sup> Gamu mu riki folaa ana nae, na a Abraham e manata mamana ana a God ma ka iilia laugo si doo diana. Ma si doo diana nae na naa nia e iilia naa ka aadea na manata mamananaa nia ka fono. <sup>23</sup> Ma si doo diana na a Abraham e iilia, ka faamamanaa na Kekedelaa Aabu gi baa e urii, <<A Abraham e manata mamana ana a God, nia naa a God ka haea ana nia na wane o'olo, sulia na manata mamananaa nia.>> Nia naa, gera alangia ana na wane kwaimaani a God. <sup>24</sup> Muka aada haitamana, si kada na wane e iilia si doo e diana, nia naa tara a God kafi alangia ana na wane o'olo. Langi lau sulia na manata mamananaa tee bali go ana taifilia.

<sup>25</sup> Ni Rahab na geni ooeoe baa e urinae laugo. I nia e gonitainia na roo wane baa gi Jiu na a

Josua e ooduda. Sui i buira, nia ka adomida eeri daaro ka tafi sulia ta tala e'ete na ana. Nia naa, sulia si doo diana nae gi ni Rahab e iilia, e aadea ni nia ka o'olo i mamana a God.

<sup>26</sup> Nia naa, iilingia na nonidoo na e langi ta aanoedoo i laona, na nonidoo nae e mae, na manata mamananalaa na ta wane ka haea nia e manata mamana ana a God, sui kasi iilia go tesi doo diana, nia e urinae laugo. Na manata mamananalaa nia e langi si mamana.

*Na baelana tooa gi.*

### 3

<sup>1</sup> Oote haasigu gi ae, muka aadaada diana, aata teni tooa oro gi ani gamu daka hasi rigita uria na haulaa ana wane faatolomaia gi. I gamu haitamana, i gami na tooa gi na mi faatolomai fuada na tooa gi, naa na a God tara ka keto gami ka liufia na tooa gi sui. <sup>2</sup> I gia sui go gia aade garo ana si kada oro. Sui, lea ta wane ka langi si garo ana tesi doo na i nia e haea, i nia naa na wane o'olo teefou. Ma i nia e bobola fai nia na olosilana na mourilana i talana eeri nia ka iilia go ana si doo diana gi. <sup>3</sup> Na fakana na tooa gi si lifu to'ou ana go ana ana na nonina na tooa gi, sui taa nia e bobola uria baita usia na noni teefou. Nia iilingia ta kade halo to'ou baa da aalua i fakana na hosi, ma daka bulasia ana hosi baita ana si kade halo to'ou nae, hai ka lea ana si lifu go ana na da dooria ka lea uria. <sup>4</sup> Ma si rebe doo to'ou ni aasomilana na faka e urinae laugo. Boro ana na faka ka baita ma na ooru baita ka kwaea, na rebe doo to'ou nae ni aasolaa e bobola



go ana fai nia na tarilana na faka nae hai ka lea sulia na manatalana na wane na e baita ana ngalilana na faka. <sup>5-6</sup> Na fakana ta wane e urinae laugo, sulia boroï ana na doo to'ou, nia hae baita sulia na doo baita gi.

Na fakana na tooa gi e iilingia laugo na eere. Boroï ana si nanafui eere, e haru lea ka harufia go ana ta si maasu baita. Na fakana tooa na e fungu ana na doo ta'a oro gi urinae laugo. Nia si lifu to'ou go ana ana na noniga, sui taa, e bobola go ana uria na nagalana mourilaga teefou. Sulia si doo ta'a gi na tooa gi da haeda e ita mai faasia a Satan, ma ka suungia na mouria na wane ma ka bobola ka haungia.

<sup>7</sup> Na tooa e faamanatainia na doo mouri kwasi gi ana fai ae ma na manu gi ma na loi gi ma na iia gi. <sup>8</sup> Sui, na tooa gi e langi dasi too go ana ta rigitaa uria na faamanatailana na fakana i talana. Sulia na fakana tooa e ta'a asianaa ma langi ta wane si bobola uria olosilana. Ma na faka e haea si doo bubulo gi uria na haumaelilana na tooa. <sup>9</sup> Ana na fakaga naa, gia baelafea ana Lord na Maa gia, ma gia ka kwala laugo ana teni tooa aai na a God e haungaida ka iilingi nia laugo. <sup>10</sup> Na baelaa diana gi ma na baelaa ta'a gi go da haga mai faasia tee faka e doo nae go. Haasigu gi ae, si doo urinae e langi kasi diana. <sup>11</sup> Na kafo fai nia na aasi e afetai daaro ka haga mai faasia tee mae busu go. <sup>12</sup> Ma e afetai na kafo ni gwoulaa ka ita mai faasia na aasi. Ma na ai na da alangia ana na figi e afetai ka fungu ana na fufue doo gi ana ai na da alangia ana na oliv. Ma na oko na da alangia ana na grep

e afetai ka fungu ana na fufue na figi.

*Na liotoo faasia a God.*

<sup>13</sup> Haia, ni tei ani gamu na e haea nia e too ana na liotoo ma ka haitamana na doo oro gi? Na wane nae ka faatainia na liotoo nia ma na haitamadoolaa nia ana na iililana si doo diana gi ma nia ka faato'ou ani nia i talana. <sup>14</sup> Ma sui, lea na liogamu gi ka fungu go ana ana na kwaifia ma na rakehasua ma na hasi ta'ala, langi musi faabaita gamu ma langi musi suge ana na mamanaa. <sup>15</sup> Na liotoo urinae langi si lea mai faasia i langi. Nia na doo laona molaagali go ana ma a Satan na e falea. <sup>16</sup> Si kada na liona na toa na e fungu ana na kwaifilaa ma na hasi ta'ala, ka fainuia go ana na doo gi sui ma na doo ta'a oro na ka fuli laugo. <sup>17</sup> Sui taa, na wane na e too ana na liotoo na e ita mai faasia a God, e langi si iilia tesi doo na e ta'a, ma nia naa na doo initoo ka tasa. Ma e langi si doori firu. Nia ka gwaromaabe ma ka kwaimaani diana fai nia na toa gi sui, ma ka too ana kwaimanatailaa fuana toa gi, ma ka aade diana fuada, ma ka langi si ketoa na toa ana rikilana go ana i bali maa, ma ka langi si suge ana na aabulolaa nia. <sup>18</sup> Na fanualama e iilingia na mige doo. Na toa gi na da lusia na toa faasia firulaa, i gera naa na toa da fasia na mige doo nae. Ma gera ka gonina na aabulolaa diana.

## 4

<sup>1</sup> Haia, ma ni gamu haitamana si doo na e aadea muka oolisuus ma muka doori firu? Si

manatalaa naa uria na doorilana na doo oro gi fuagamu i talagamu naa na e aade urinae ani gamu! Si manatalaa ta'a urinae gi e firu fai nia na manatalaa diana gamu gi. <sup>2</sup> Nia naa, muka dooria asianaa na doo oro gi, sui ma e langi musi too ana, nia naa muka doori hauwane. Ma si kada e langi musi ngalia na doo gi na mu dooria asianaa, gamu muka hafali oolisuusuu naa ma muka firu na agamu. Utaa? I gamu mu haitamana si doo na e aadea musi too ana si doo gi na mu dooria? Si doo nae e urinae sulia e langi musi gania go a God uria. <sup>3</sup> Sui boro'i ana muka gania a God uria tesi doo, e langi musi ngalia, sulia na aena muka gania e ta'a. Ma muka dooria go agamu si doo gi na e falea na noni hahalalaa fuagamu i talagamu go ana.

<sup>4</sup> Ma muka lea aata go agamu faasia a God, iilingia ta inite aai na e lea aata go ana faasia na aarai nia. Lea muka kwaimaani fai nia na molaagali, haia muka maalimaea fuana a God. Sulia lea so ta wane ka dooria ana na lealaa sulia na manatalaa i laona molaagali, e afetai nia ka lea sulia na manatalaa nia a God. Utaa? Gamu langi si haitamana go si doo naa? <sup>5</sup> Na Kekedelaa Aabu gi da haea na aanoedoo na a God e aalua ani gia e too ana na kwaidooria na e rigita uria na doorilana na doo oro e'ete gi. E utaa? Gamu manata haso na baea na doo o'oni go ana? Langi. <sup>6</sup> Ma sui boro'i ana ka urinae, na rakediana nia a God e baita ka liufia si doo naa. Nia naa, na Kekedelaa Aabu gi ka bae ka urii, <<A God e oote nia ana wane na e faabaita, ma ka rakediana ana na wane na e faato'ou nia i talana.>>

<sup>7</sup> Nia naa, muka faato'ou gamu i tala gamu ma

muka iilia si doo gi na a God e haea. Ma muka firu rigita usia a Satan hai ka tafi faasi gamu. <sup>8</sup> Haia, ni gamu muka idu mai garangia a God eeri ni nia laugo ka idu mai garangi gamu. Sulia si kada naa, na doo ta'a oro gi gamu mu iilia, nia naa muka lugasia! I gamu mu iilia na doo diana gi si kada na tooa da riki gamu go ana, sui na mouria gamu gi e bilia ua. Muka faafaalua na mouria gamu gi! <sup>9</sup> Gamu muka liobukonu ma muka aangi uria si doo naa. Sulia e langi si bobola hai muka waela ma langi muka eele. <sup>10</sup> Ma muka faato'ou gamu i maana a Lord eeri nia tara ka faabaita gamu.

<sup>11</sup> Haasigu gi ae, muka too faasia na hae ta'alaa ana ta wane aai. Haia, lea so muka hae ta'a ana ta wane na e manata mamana ana a Christ laugo, ma lea so muka keto nia, gamu mu hae ta'a na ana ma muka ketoa naa na kwaieresia a God gi. Ma si kada gamu ketoa na kwaieresia naa gi, gamu langi lau na tooa gi uria na roosulilana na kwaieresia. Ma mu aalu gamu i tala gamu ana na tooa gi uria na ketolana na kwaieresia gi. <sup>12</sup> Utaa? Gamu manata agamu haso i gamu naa na a God, hai muka ketoa ta wane? A God naa na e falea na kwaieresia gi, ma i nia taifili nia go na e bobola fai nia na faamourilaa ma na haungilana wane.

<sup>13</sup> Teni tooa ani gamu mu haungainia tee doo laona na manatalagamu muka bae urii, <<I tara'ena ma langi i bobongi mika lea naa uria tee fera baita. Ma tara mika too mai seenae

sulia ta tee fe ngali, hai mika iilia raoa agami gi uria todalana malefo oro gi.>> <sup>14</sup> Haia, ma ni nau ku haea fuagamu, langi ta wane ani gamu kasi haitamana tesi taa na ka dao fuana i bobongi. Sulia gia ka iilingia go aga ta dasa na e hagatafa mai ma na tooa gi daka rikia, sui ka funu laugo ana. <sup>15</sup> Si doo na so molu ka haea e urii, <<Lea so a God ka faalamainia, gia ka mouri aga, ma gia ka iilia aga si doo na gia manata ana.>> <sup>16</sup> Sui taa, i gamu naa mu faabaita gamu asianaa ma muka baelafe gamu go ana i tala gamu. Si aadelaa urinae na e garo asianaa.

<sup>17</sup> Nia naa, lea ta wane ka haitamana go ana si doo o'olo gi ni iililana ma ka langi si iilia go, i nia e aade ta'a naa.

*Na tooa gi na da rikidoo.*

## 5

<sup>1</sup> Haia, i gamu na tooa gi na mu todadoo, muka aangii baita na ana si kada naa. Sulia na ta'alaa na totoo ka toe gamu e baita asianaa. <sup>2</sup> Sulia na todadoo gamu gi ka fura. Ma na maku gamu gi, na subu gi da anida naa. <sup>3</sup> Ma na malefo gamu gi ka bura sui naa laugo. Haia, ma si buralaa naa tara ka ania na mariko miu iilingia na eere, sulia e faatainia gamu mu garo asianaa. Sulia ana fe dani i'isi naa gi, mu figua na todadoo gamu gi. <sup>4</sup> Muka fafurongo ana na aangilaa na wane ni rao gamu gi na da rao i laona na raoa gamu gi i hara, sulia i gamu mu foli fefe ani gera ana si kada gi sui ana na fofolia gera gi. Ma a God na

Lord gia na e rigita ka tasa, nia ka rongoa sui naa na aangilaa gera na wane ni rao nae gi.

<sup>5</sup> Haia, ana si kada naa, gamu todadoo na doo diana oro go asianaa. Ma gamu mu too ana na doo nae gi ma muka eele asianaa sulia. Sui muka iilingia na bulumakau na da faakobua, hai so ka bobola fai nia fe dani na daka haungia ana. <sup>6</sup> Ma i gamu mu olea ma muka haungia na tooa o'olo gi, sui boroi gera langi dasi suusi gamu go.

<sup>7</sup> Haasigu gi ae, muka fefelete ma muka kwaimaasi fuana fe dani a Lord ka dao mai. Muka manata fasi sulia si kada na wane e rao i hara, nia e fefelete maasia na uuta hai ka aru fasi, sui kafi kwaimaakwali maasia na gonidoolaa. <sup>8</sup> Gamu laugo muka fefelete. Muka manata ngado go agamu, sulia na maedani a Lord uria daolaa mai e garangia naa.

<sup>9</sup> Haasigu gi ae, langi musu ugainia ta haasi agamu, aata a God ka keto gamu. Sulia a God e kwaimaasi sui naa uria na ketolana na tooa gi sui. <sup>10</sup> Oote haasigu gi ae, mu manata fasi sulia na profet baa gi i nao, baa da bae talana a God. Sui boroi ana na tooa gi daka illia na doo ta'a oro gi fuagera, na manata mamanalaa gera ka ngado go ana. Haia, ma ni gamu laugo, muka aade iilingi gera. <sup>11</sup> Gia ka haitamana, i gera da eele sulia da manata mamana ngado. Muka rongoa sui naa na uunuunua baa sulia a Job. Na doo ta'a oro asianaa baa e daotoona nia, sui ka manata mamana go ana ana a God. Ma i buri, a Lord ka aadasulia, sulia a Lord e kwaimanatai fuana na

tooa gi, ma ka dooria asianaa na adomilana tooa gi.

<sup>12</sup> Haasigu gi ae, si doo baita fuana muka haitamana e urii, langi musu bae aalualu urii, <<E mamana mai i halo>>, ma langi muka bae urii, <<E mamana mai i laona molaagali naa,>> langi tesi doo lau. Ma lea mu haitamana si doo nae e mamana, muka bae urii, <<E mamana.>> Ma lea so muka haitamana si doo nae e langi si mamana, muka bae urii, <<E langi si mamana.>> Ma lea so e langi musu roosulia si doo naa, tara a God ka falea na kwakwaelaa fuagamu.

<sup>13</sup> Ma lea ta wane ani gamu ka too ana ta afetaia, nia ka fooa. Ma lea so ta wane ka eele asianaa, nia ka iilia na nguu ni baelafelaa fuana a God. <sup>14</sup> Ma lea so ta wane ani gamu ka matai, nia ka gania na wane naonao gi ana na soefaataia hai daka fooa fuana ma daka gwaia ana na hatana a Lord. <sup>15</sup> Ma tara a God ka faa'akwaa tooa matai nae sulia da fooa fuana ma daka manata mamana ani nia. A God ka gura nia, ma na aadelaa ta'a nia, tara a God ka manata luke nia uria si doo nae. <sup>16</sup> Nia naa, na garolaa gamu gi sui, muka faatalo ani gamu kwailiu i tala gamu, ma muka fooa fuagamu kwailiu eeri gamu akwaa lau. Na fooalaa nia na wane diana e rigita ma ka mamana. <sup>17</sup> Na profet Elaeja, nia na wane go ana laugo iilingi gia. Sui si kada baa i nia ka fooa rigita fuana a God eeri ka faasuia na uuta baa, na uuta ka langi si aru sulia na oolu fe ngali ma oono fe sinali. <sup>18</sup> Ma i buira, nia ka fooa lau fuana a God eeri ka falea lau mai na uuta, ma

na uuta ka aru lau, ma na doo gi sui i fafona hae gano daka tae, ma na fufuedoo ka too lau.

<sup>19</sup> Haasigu gi ae, lea ta wane ani gamu ka lea garo faasia na faatolomailaa mamana, e diana asianaa e tala ana ta wane ani gamu ka oolifainia. <sup>20</sup> Sulia si kada gamu aade urinae ani nia, gamu mu adomi nia nae, hai a God ka faamouria na mangona faasia na maea, ma ka manata lukea faasia na aade ta'alaa oro nia gi.



## **Lau New Testament**

### **Lau: Lau New Testament (New Testament)**

copyright © 1992 Wycliffe Bible Translators, Inc.

Language: (Lau)

Contributor: Wycliffe Bible Translators, Inc.

All rights reserved.

2020-11-23

---

PDF generated using Haiola and XeLaTeX on 21 Feb 2024 from source files dated 29 Jan 2022

04ff0905-6192-57c6-8d94-302e2c78a1da